



Utukufu wa Nguvu ya Mungu

Kila andiko lenye pumzi ya Mungu, lafaa kwa mafundisho, na kwa kuwaonya watu makosa yao, na kwa kuwaongoza, na kwa kuwaadibisha katika haki; ili mtu wa Mungu awe kamili amekamilishwa apate kutenda kila tendo jema.—**2 Timotheo 3:16, 17.**

Mungu amependezwa kuwasilisha ukweli Wake kwa ulimwengu kwa njia ya mawakala wa kibinadamu na Yeye Mwenyewe kwa njia ya Roho Wake Mtakatifu, aliwafanya watu wafae na kuwawezesha kuifanya kazi hii. Aliiongoza akili katika kuchagua cha kusema na cha kuandika. Hazina iliwekwa katika vyombo vya udongo, na bado ni hazina iliyotoka Mbinguni. Ushuhuda umewasilishwa kwa njia ya maneno yasiyokuwa makamilifu ya lugha ya kibinadamu, japokuwa ni ushuhuda wa Mungu; na mtoto wa Mungu mtiifu anayeamini, anaona ndani yake utukufu wa nguvu ya Mungu aliyejaa neema na kweli.

Katika Neno Lake, Mungu amewapa wanadamu maarifa muhimu kwa ajili ya wokovu. Maandiko Mtakatifu yanapaswa kupokelewa kama Ufunuo wenye mamlaka usiokosea wa mapenzi Yake. Maandiko ni kiwango cha tabia, mfunuaji wa mafundisho, na kipimo cha uzoefu....

Hata hivyo, ukweli kuwa Mungu amefunua mapenzi Yake kwa wanadamu kwa njia ya Neno Lake, hauondoi hitaji la uwepo na uongozi endelevu wa Roho Mtakatifu. Kinyume chake, Roho Mtakatifu aliahidiwa na Mwokozi wetu, ili kulifunua Neno kwa watumishi Wake, kuangazia na kutumia mafundisho yake. Na kwa kuwa ni Roho wa Mungu aliyeongoza uandishi wa Biblia, haiwezekani kuwa fundisho la Roho liwe kinyume na fundisho la Neno.

Roho hakutolewa—wala hawezi kutolewa—ili kuchukua nafasi ya Biblia; kwa kuwa Maandiko yanasema wazi kuwa Neno la Mungu ni kiwango ambacho kwacho mafundisho yote na uzoefu vinapaswa kupimwa. Alisema mtume Yohana, “Msiiamini kila roho, bali zijaribuni hizo roho, kwamba zimetokana na Mungu; kwa sababu manabii wa uongo wengi wametokea duniani” (1 Yohana 4:1). Na Isaya anasema, “Na waende kwa sheria na ushuhuda; ikiwa hawasemi sawa sawa na Neno hili, bila shaka kwa hao hapana asubuhi” (Isaya 8:20)....

Kwa kupatana na Neno la Mungu, Roho Wake alipaswa kuendeleza kazi ya Neno la Mungu katika kipindi chote cha kazi ya kutangaza injili. Katika zama ambazo Maandiko ya Agano la Kale na Jipya yalikuwa yakitolewa, Roho Mtakatifu hakukoma kuwasilisha nuru kwa watu binafsi, kando ya mafunuo yaliyowekwa pamoja kuunda Biblia Takatifu. Biblia yenyewe inasimulia jinsi ambavyo, kwa njia ya Roho Mtakatifu, watu walipokea maonyo, Makaripio, ushauri na maelekezo, katika mambo ambayo hayakuhusiana kabisa na utoaji wa Maandiko. Sehemu zingine zinataja manabii katika zama tofauti, ambao maneno yao hayakuandikwa popote. Katika hali inayofanana na hiyo, baada ya kukamilisha na kufunga orodha ya vitabu vinavyounda Biblia, Roho Mtakatifu aliendelea na kazi Yake ya kuangazia, kuonya, na kuwafariji watoto wa Mungu (Pambano Kuu, toleo la 11. uk. 5-7).